

বাণিজ্য

আন্তর্জাতিক সীমান্ত ডিজিটাল লেনদেনে নতুন কাঠামো চালু

প্রতিবেদক: ঢাকা প্রোব ডেস্ক

প্রকাশের তারিখ: রোববার, ৩০ আগস্ট ২০২৬, ০৫:২৩ PM



ছবি সংগৃহীত

দেশের লেনদেন অবকাঠামো আধুনিকায়ন, বৈদেশিক রেমিট্যান্স প্রেরণ সহজ করা এবং ডিজিটাল আর্থিক অন্তর্ভুক্তি বাড়াতে ঐক্যবদ্ধ-মধ্যস্থতাকারী আন্তর্জাতিক সীমান্ত ডিজিটাল লেনদেন কাঠামো চালু করেছে বাংলাদেশ ব্যাংক।

বুধবার (২৯ জুলাই) বাংলাদেশ ব্যাংকের বৈদেশিক মুদ্রানীতি বিভাগ (এফইপিডি) একটি সার্কুলার জারি করেছে।

নতুন নির্দেশনা অনুযায়ী, অনুমোদিত ডিলার (এডি) ব্যাংকগুলো বিদেশি পেমেন্ট সেবা প্রদানকারী প্রতিষ্ঠান, ডিজিটাল প্ল্যাটফর্ম ও অনলাইন পেমেন্ট গেটওয়ে অপারেটরদের সঙ্গে অংশীদারিত্বের মাধ্যমে আন্তর্জাতিক সীমান্ত ডিজিটাল পেমেন্ট সেবা দিতে পারবে।

সার্কুলারে বলা হয়েছে, বৈদেশিক মুদ্রা ছাড়প্রাপ্ত গ্রাহকদের জন্য ব্যাংকগুলো ডিজিটাল ভ্যালু অ্যাকাউন্ট (ডিভিএ) বা ডিজিটাল ওয়ালেট

খুলতে পারবে। প্রতিটি ডিভিএ সংশ্লিষ্ট ব্যাংকের একটি মাস্টার ডিভিএ বা সেটেলমেন্ট হিসাবের অধীনে উপ-হিসাব হিসেবে পরিচালিত হবে। এতে সব ধরনের লেনদেনের ওপর ব্যাংকের পূর্ণ নিয়ন্ত্রণ ও তদারকি নিশ্চিত হবে।

এ সুবিধার আওতায় দেশের বাসিন্দারা ব্যক্তিগত, চিকিৎসা ও সরকারি সফরসংক্রান্ত ব্যয় নির্বাহ করতে পারবেন। পাশাপাশি প্রতিটি লেনদেনে সর্বোচ্চ ৩০০ মার্কিন ডলার পর্যন্ত আন্তর্জাতিক অনলাইন পেমেন্ট করা যাবে। তথ্য-প্রযুক্তিভিত্তিক সেবা গ্রহণ, ভিসা প্রসেসিং ফি, সদস্যপদ নবায়ন এবং অনলাইনে হোটেল বুকিংয়ের অর্থও ডিভিএ থেকে পরিশোধ করা যাবে।

ব্যবসায়িক প্রতিষ্ঠানগুলোর ক্ষেত্রে এক্সপোর্ট রিটেনশন কোটা (ইআরকিউ) হিসাবের বিপরীতে প্রতিষ্ঠানের সর্বোচ্চ তিনজন শীর্ষ কর্মকর্তা প্রকৃত বৈদেশিক ব্যবসায়িক ব্যয়ের জন্য এ সুবিধা ব্যবহার করতে পারবেন।

স্বচ্ছতা নিশ্চিত করতে ব্যাংকগুলোকে ডিভিএ-সংক্রান্ত সব লেনদেনের মিরর লেজার সংরক্ষণ এবং অংশীদার ডিজিটাল পেমেন্ট সেবা প্রদানকারীর (সিডিপিএসপি) সঙ্গে রিয়েল-টাইম সংযোগ স্থাপনের নির্দেশ দেওয়া হয়েছে। এ ছাড়া ডিভিএতে অব্যবহৃত অর্থ ব্যাংকের নিয়ন্ত্রণেই থাকবে এবং বিদ্যমান বৈদেশিক মুদ্রা বিধিমালা অনুযায়ী তা দেশে সমন্বয় করা হবে।

বাংলাদেশ ব্যাংক জানিয়েছে, এ সেবা পরিচালনায় ব্যাংকগুলোকে কঠোর গ্রাহক পরিচিতি (কেওয়াইসি), গ্রাহক যথাযথ যাচাই (সিডিডি) এবং অর্থপাচার ও সন্ত্রাসে অর্থায়ন প্রতিরোধবিষয়ক (এএমএল/সিএফটি) বিধান কঠোরভাবে অনুসরণ করতে হবে।

নতুন এই কাঠামোর আওতায় আন্তর্জাতিক বৈদেশিক অর্থ প্রেরণ সেবা চালু করতে আগ্রহী ব্যাংকগুলোকে বাংলাদেশ ব্যাংকের প্রধান কার্যালয় থেকে পূর্বানুমোদন নিতে হবে।

এ বিভাগের আরও খবর



সবজিতে স্বস্তি থাকলেও চড়া ভিম-মাছ-মুরগির দাম
রাজধানীর বাজারে দীর্ঘদিন ধরে বাড়তি দামে বিক্রি হচ্ছে ভিম, মাছ ও মুরগি। এর সঙ্গে বেড়েছে আটা ও চিনির দামও। তবে
সরবরাহ বাড়ায় কিছুটা কমেছে ব...



তিন বছরে চার শতাধিক গার্মেন্টস কারখানা বন্ধ হয়েছে: বাণিজ্যমন্ত্রী
২০২৩ সালের জুলাই থেকে ২০২৬ সালের জুন পর্যন্ত তিন বছরে চার শতাধিক গার্মেন্টস কারখানা বন্ধ হয়েছে। এর মধ্যে বিজিএমইএর সদস্য ২৮২টি এবং বিকেএমইএ...



৬ মাসে অর্থনীতিতে কিছু ইতিবাচক পরিবর্তন এলেও নেতিবাচক প্রবণতাই বেশি: সিপিডি
সরকারের প্রথম ৬ মাসে অর্থনীতিতে কিছু ইতিবাচক পরিবর্তন এলেও সামগ্রিকভাবে নেতিবাচক প্রবণতাই বেশি বলে মনে করছে সেন্টার ফর পলিসি ডায়ালগ (সিপিডি)...



রমজানে পণ্যমূল্য স্থিতিশীল রাখতে আগাম প্রস্তুতি
আগামী রমজানে নিত্যপ্রয়োজনীয় পণ্যের সরবরাহ স্বাভাবিক ও দাম স্থিতিশীল রাখতে আগাম প্রস্তুতি শুরু করেছে বাণিজ্য মন্ত্রণালয়। রমজান মাসে নিত্যপণ্য...

Copyright Dhaka Probe

অনলাইন সংস্করণ পড়তে ভিজিট করুন: <https://www.dhakaprobe.com/business/ant-simant-dijtal-lendene-ntun-kathamo-chalu>